

En pia regurdientscha dil defunct

11.3.80

## Benedetg Deflorin-Camadini, Trun/Campliun

Mai ei la devisa dalla Cureisma: «Patratga o carstgaun che ti eis puorla e che ti retuornas a puorla» pli impresiunonta che il di da sepultura.

Zacons dis ein già vargai ch'in conduct da bara semoya da Campliun viers il santeri da sogn Martin. Il zennet dalla caplutta da sontga Catrina e ses vischins accumpognan il defunct Benedetg al davos ruaus. Cun mó 61 onn ha el – suenter liung pitir – dau adia a nossa paupra val da larmas. Igl ei buca ina veta spectaculara che nus lein undrar cuortamein, mo tondanova von vengonza d'ina menziun honorifica.

Ils Deflorins ein vischins-burgheis da Mustér. Il defunct Benedetg ei naschius a Rueras sco fegl da Sep Mattias e dalla Anna Maria, nata Gisler. Quei pèr «intercantunal» fuva sesanflaus a Silenen (Uri) e suenter in pèr onns setratgs a Rueras, nua ch'il Sep Mattias fageva il caluster e spazzatgamin, omisdus posts «lucratis», l'in sco l'auter. 1924 setila la zun numerusa famiglia Deflorin-Gisler a Trun/Campliun. Il spazzatgamin dat vonzei si sia occupaziun, s'annunzia e vegn elegius sco emprem administratur dalla casa pauperila communal da Trun. In um da confidanza, e surtut premurau bab dà sia roschada affons.

Il Benedetg crescha si en quei cauld ambient famigliar. Bien e baul sto el gustar paun jester – beinduras ualts secs – tier purs ed ad alp. Carschius si e plitost falombers fa el il manual tier



differentas firmas da construcziun ella vischinonza. Dapi 1963 pitescha Benedetg d'in grev accident sin la lavur – ina nauscha tumplentga d'in crap el dies – dalla quala el ei mai serevegnius cumpleinamein. – 1951 ei il defunct maridaus cun la giuvna Matilda Camadini. La lètg ei stada benedida cun ina feglia ed in fegl. Benedetg ei staus in fideivel mariu e bab plein carezia.

Il defunct haveva differents hobis: Affecziun per animals – magari exotics sco aucas ed andas – ed il regl da rimnar caussas veglias aschia che siu bi ambient sepresenta sco in pign museum. – Sch'ins less – per finir – caracterisar il preziau defunct, savess ins resumar aschia: in um da siu fatg, empau originals, in vischin pacific, adempiu amplamein sias obligaziuns, sustenius e tgiraus cun carezia da sia consorta. – Benedetg Deflorin, rruaussi ella pasch eterna. RIP. G.V.